

---

## СВЕРДЛОВСК ВИЛОЯТИ ТАДБИРКОРЛАРИ ФАРҒОНАДА ТАЙЁРЛАНАЁТГАН ТЕКСТИЛЬ ВА ТЎҚИМАЧИЛИК МАҲСУЛОТЛАРИГА КАТТА ҚИЗИҚИШ БИЛДИРМОҚДА

Бугун Ёшлар ишлари агентлиги вилоят бошқармаси фаоллар залида вилоят ҳокимининг ўринбосари Иқболжон Эргашев Россия Федерациясининг Свердловск вилояти халқаро ва ташқи иқтисодий алоқалар вазирининг ўринбосари Людмила Берг бошчилигидаги 10 нафарга яқин текстиль маҳсулотлари импортёрлари билан учрашув ўтказди. Тадбирга вилоятимиздаги экспортёр корхоналар вакиллари ҳам жалб этилди.

Мулоқотда Фарғонанинг савдо-иқтисодий, туризм салоҳияти, тўқимачилик саноати, экспорт имкониятлари тўғрисида маълумот берилди. 2022 йилда Фарғона вилояти экспорти ҳажми 786 миллион долларни ташкил этиб, унда енгил саноат маҳсулотлари етакчилик қилаётгани алоҳида таъкидланди.

Фарғона ва Свердловск вилоятлари ўртасида дўстлик муносабатларини мустаҳкамлаш, ҳудудлараро ҳамкорликнинг янги йўналишларини кенгайтириш, ўзаро манфаатли алоқаларни йўлга қўйиш ҳақида сўз борди.

Тўқимачилик саноати тақдиротида эса вилоятда текстиль йўналишида амалга оширилаётган ишларга эътибор қаратилди. Меҳмонлар вилоятимизда тайёрланаётган текстиль маҳсулотларига катта қизиқиш билдирдилар.

Россиялик тадбиркорлар билан фарғоналик ишбилармонлар ўртасида тўғридан тўғри алоқаларни ривожлантириш, вилоятимизда тайёрланаётган текстиль маҳсулотларини Россия бозорларига етказиш чора-тадбирларини белгилаш таклифлари ўртага ташланди. В2В шаклидаги музокараларда ҳам айтилган жиҳатлар устуворлик қилди. Учрашувдан сўнг меҳмонлар вилоятимиздаги текстиль корхоналари билан танишиш мақсадида ҳудудларга йўл олдилар.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2023-03-15 15:19:47